



Inatsisartunut ilaasortaq Aleqa Hammond, Siumut
Maani

EU-p puisit pillugit peqqussutaa pillugu Naalakkersuisunut apeqquteqaammut nr. 43-mut akissuteqaat

j. nr. 01.28/2010-43
Ulloq 23. februar 2010
Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@gh.gl
www.nanoq.gl

Inatsisartut suleriaasianni § 36 imm. 1 naapertorlugu EU-p puisit pillugit peqqussutaa pillugu apeqquteqaateqarputit. Apeqqut uannut akisassanngorlugu innersuusutigineqarpoq

1) EU-ip puisit amii pillugit aaliangersagaliaanut maanna piunasaqaatinik aammalu nalunaarsueriaatsimut suliaqarnerani Naalakkersuisut nunarput sinnerlugu suliniarnermi qanoq peqataatigaa aammalu sunniuteqartigaa?

1-imut) Naalakkersuisut ukiuni kingullerni sisamani aamma Europa-Parlamentip Siunnersuisoqatigiillu puisimit nioqqutissianik niuruteqarneq pillugu peqqussutaat (EF) Nr. 1007/2009, 16. september 2009-imeersup akuersissutigineqareernerata aamma kingornatigut Nunanut allanut ministeriaqarfik Kalaallillu Nunaata Bruxellesimi Sinniisoqarfia peqatigalugit peqqussutip atulersinneqarnissaata tungaanut ammit Kalaallit Nunaanninnganneersut niurutigineqaannarsinnaanerit ilungersorlutik sunniuteqarfiginiaarsimavaat. Suleqatigiinnerup tamatuma ilaatigut kingunerisaanik, puisimit nioqqutissiat Kalaallit Nunaanninnganneersut Inunninnganneersullu peqqussutikkut ammaanngarneqarnerat qulakkeerneqarpoq.

Suliat kingulliit EU CITES komitemi peqqussutip ulloq 21. januarimi siullermeerneqarneranut peqataanikkut ingerlanneqarput. CITES komitemi ataatsimiinnerni siunertarineqarpoq peqqussutip pineqartup naammassillugu oqaasertalersorneqarnissaa. Kalaallit Nunaanni puisit amiinik niuruteqarnerup aaqjissuunneqarnera pillugu saqqummiussisussat Kalaallit Nunaat aggersarneqarpoq. Komite itisiligassanik amerlasuunik apeqquteqarpoq, aamma peqqussutip atortussanngortinneqarnissaanut immikkoortunik misissuinermit atatillugu atugasanik.

Kingorna Namminersorlutik Oqartussat Aalisarnermut, Piniarnermut Nunalerinermullu Naalakkersuisoqarfikkoorlugu (APNN) attuumassuteqartut Great Greenland A/S, Aningaasaqarnermut Naalakkersuisoqarfikkoorlugu Akileraartarnermut Aqutsisoqarfik kiisalu Inuusutissarsiornermut Suliffeqarnermullu Naalakkersuisoqarfik ilanngullugit peqqussutissatut atortussanngortussaqaq tusarniaassutigaa. Pisuni tamarluinnarni APNN-ip oqaasiinnartigut allakkatigullu erseqqissartarpaa, siunissami peqqussutip atortussanngortinneqarnissaanut aningaasartuutaajunnartut 2010-mut aningaasanut inatsisikkut matussuserneqarsimanngitsut, AIS 2010 suliarineqarnerata nalaana allaffissornikkut aningaasartuutissat ilisimaneqanngimmata, aammalu suli tamakkiisumik

qulaarneqarnatik, atuutilersitsinissamut peqqussutissaq missingersuut sulii EU-mi suliarineqarmat. Peqatigisaanik APNN-ip EU nalunaarfigaa, peqqussutip atortussanngortinneqarnerata kingunerisaanik aningaasartuuteqarnerunissamut matussutissanik aningaasatigut tapiiffigineqarnissamut EU-mik isumaqatiginiarnissaq siunertaralugu missingersuusiortoqassasoq, aqutsinissaq kiisalu nakkutilliinissaq allaaserineqassasut ilanngullugit.

Inussiarnersumik inuulluaqqusillunga

Ane Hansen
Aalisarnermut, Piniarnermut Nunalerinermullu Naalakkersuisoq